

Labayen'ek eta Larzabal'ek adierazi dute zer asmo duen batzordeak datorren illean, euskal-teatroari buruz, egin nai den Euskaltzaleen Biltzarrerako. Ontzat artu dira beren esanak eta bear diren baimenak eskatzeko eginbidea idazlariari egotzi zaio.

Zarautz-en «Coca-cola»-ren diru-laguntzarekin eratu den aur sariketaren berri emán du Zatarain'ek, bera, Eizmendi eta Etxaide izan baitira maieko.

Arrue'ren izenean, zadorlariak adierazi du bertsolari-saillekoek artu duten asmoa. azken txapelketan ibilli ziren bertsolari guztiei *Auspoa*-ko liburuak ematekoa; alegia, Euskaltzaindiaren bizkar, orrela gaiñera euskal-liburu-sail bikain oni laguntzekotan. *Auspoa*-koek bana bitzate liburuak, Euskaltzaindiak ordaintzen dituelarik.

Bilbao'n egin berria den bertsolari sariketaz mintzatu da Irigoyen. Haritschelhar'ek, berriz, azaldu ditu Miarritze'tik aurtengo udan egin diren irrati-saioak eta, batez ere, «Euskaltzainak erakasle» deritzan sailla: or mintzatu dira, euskal-idazleez, Dassance, Eppherre, Haritschelhar, Iratzeder, Lafitte, eta Larzabal euskaltzainak, Orrezaz gaiñera, Parisen izan diren gora-beherak aipatu ditu gurea, beste izkuntzen artean, irakaskuntzan erabil dedin.

Merino Urrutia jaunak bidali duen eskutitza irakurri da. Zadorlariari erantzunaz eginahalak egingo dituztela dio, bai berak eta bai *Junta de Cultura*-koek, berriz ere Bizkai'ko eskoletarako euskeraz jakitea merezigarri izan dedin.

Tournier jauna zenaren oroitzapenetan mintzatu da Irigaray, aren euskal-lanak adieriaz, Euskaltzaindiak bere dolumina ager dezan eskatuaz aren eriotzea dela eta. Orrela egin bedi.

Oi den otoitzez asi eta bukatu da batzarrea.

*Euskaltzainburuordea*

A. IRIGARAY

*Idazlaria*

LUIS MITXELENA

Donostia'n, Diputazio-jauregian, 1965-IX-24-ean, bildu dira: Arrue, Irigaray, Irigoyen, Labayen, Lekuona, Mitxelena, San Martín eta Satrustegi euskaltzainak; Eizmendi, Kerexeta, Zubikarai eta Zugasti laguntzaileak. Ezin etorria gaztigitu du Lojendio euskaltzainak.

Azken Batzarreko agiria irakurri da eta ontzat artu.

Teatro-gaiaz, Euskaltzaindiak eraturikako Euskaltzaleen Biltzar bezala, egiten ari diren itzaldiak aipatu dira, bart izan baitzen lehena, Eppherre euskaltzainarena, Zuberoa'ko pastorelez. Eskerrak eman bekizkio eta zorionak ere bai, ain atsegin izan zitzaizen ezkeru entzule guztiei.

Bizkai'ko Diputazio-buruarena irakurri da Euskaltzaindiak egin zion eskabideari baietz esanaz. Irakasle euskaldunak, beraz, onerako izango dute, lehen bezala, euskeraz jakitea. Erantzun bekio eskerrak emanaz.

Jesus'en Konpainia'ko Aita P. Muxika'k Euskaltzaindiari eskeiñi dio oraindik zabaldu gabe dagoen bere *Diccionario Vasco-Español* deritzan iztegi ederraren ale bat. Eskerrak eta zorionak eman bekizkio, egin duen lan ederragatik.

Beste bi eskutitz artu dira Bilbao'ko 5-garren Epaitegitik: Bilbao'ko juezbarrutian bizi diren euskaltzainen izen-zuzenbideak eskatzen dituzte. Orrela egin bedi, euskaltzain oriek jakinaren gainean jarriaz.

Toribio Alzaga teatro-saria dela-ta «Epai-maia'koak ao batez erabaki dute saria «Laratzean sua» iru ekitaldi dituan Teatro lanari ematea, besteak baño obegotzat jotzen dutelako. Egillea: Carrasquedo Olarra jauna da. Orobat erabaki dute aipamen berezia merezi dutela beste iru antzerki-lan auexek: 1.º «Nor errudun?», Xabier Gereño jaunarena. 2.º, «Brokel jauna», J. Antonio Arkotxa jaunarena. 3.º, «Biotzaren neurria», Pedro Sarrigi jaunarena. Donostia'n, 1965 Agorraren 24'n. Antonio M.ª Labayen, Agustin Zubikarai, Gabriel Aresti.» Ala jakiñerazi bekio Bizkaiko Ahorro Kaxari.

Laguntzaille izendatu dira aurkeztuak zeuden lagun oek: Franzisko Altuna, S. I., J. Antonio Arkotxa, Jose Azurmendi, O. F. M., Iñaki Barriola, Juan Jose Beloki, Iñaki Beobide, Antonio Bilbao, Aita Felix Bilbao, Jean Curutchet, Jean Louis Davant, Jean-Baptiste Dirassar, Pierre Duhour, Aita Emiliano karmeldarra, Jesus Elosegi, Jacques Etcheverry, Toribio Etxebarria, Karmelo Etxenagusia (Derio'ko irakaslea), Juan Garmendia (Zeleta), Salbador Garmendia, Xabier Gereño, Anjel Goenaga, S. I., Iñazio Goikoetxea (Gaztelu), Juan Goikoetxea, S. I., Juan Goikoetxea (Arbizu'ko apaiza), Mikel Lasa, Aita Luis M.ª Mujika, Jose Olaizola, Jesús M.ª Oleaga, Josu Oregi, Gabriel Zapiain, Manuel Ziarsolo, eta Rudolf de Rijk.

Aurrerantzean, laguntzailleak, izenak abuztuko batzarrean aurkeztu ondoren, urte-buruan autatuko dira. Datorren urtekoak izendatu baño lehen, gaiñera, finkaturik utziko da ea zenbat autatu bear diren.

Mitxelena'k esan du, lanpeturik dagoelako eta batez ere oraingoz Euskalerritik kanpora joan bearko duelako, idazkaritza utzi bearrean aurkitzen dela, il onetako batzarreko gauzak egin ondoren.

Arrue'k aditzera eman du, Suezia'n egon denean, Euskaltzaindiaren agurra bidali diola Nils M. Holmer euskalariari, berarekin egoterik izan ez badu ere.

Oi den otoiitez asi eta bukatu da batzarrea.

*Euskaltzainburuordea*

A. IRIGARAY

*Idazlaria*

LUIS MITXELENA

Donostian, Diputazioan, 1965-X-29.

Bildu dira: Lekuona, buru, Lafitte, Villasante, Satrustegi, Haritschelbar, Larzabal, San Martín, Barandiaran, Irigaray, Arrue ta Irigoyen euskaltzaiñiak. Artola ta Zatarain laguntzailleak.

Eppherre, Dassance ta Labayen-ek ezin etorria adierazi dute.

Aurreko batzarreko agiria irakurri eta ontzat artu da.

Arrue-k asiera emanik Euskaltzaindiak bere poza agertzen du Barandiaran jauna gure artean ikusteaz.

Donostiko C. A. T.-ren karta irakurri da. Zorionak ematen dizkigute urtearen buruan egindako lanagatik eta batez ere oraintsu Donostian, teatroa gaitzat artuta, antolatu diran itzaldiakatik.

Eskerrak eman bekiziko Donostiako Ayuntamentuko «Comisión de Cultura»-ri, Rufino Mendiola jauna ere aipatuaz, gorago esan diran itzaldiak antolatzeko artu cegun laguntasunagatik.